

四庫全書

史部

欽定四庫全書

文獻通考卷二百八十五

鄱陽馬端臨貴與著

象緯考八

月食月變月輝月暈

中興天文志或曰日月猶水火也火外光水含景故月之光生於日之所照其魄生於日之不照也故當日則光盈照之全也自是而闕以日光之映其有不

全乃至於晦愈相近而不之照故也嘗觀諸水日之所照每借以為光仰而映於屋梁若一有掩焉則向之光於屋梁者不復見也月之借於日猶是故夫月之光也以日之光有照焉則月之食也亦其日之光有掩焉耳人之於月獨見其光與食豈知有借於日哉太史遷曰月食常也日食不臧也是以春秋書日之食不書月食月食固無可書也然嘗試以前說推之於月之食以知日之行於地中其亦有食焉不然

則日光之全月與相望其何食之有月食所關豈細哉夫日月者象君臣也咎繇稱元首明股肱良元首叢脞股肱惰股肱良惰之分關於君德月有光食顧不然乎於是月食而書亦可也湯誥曰萬方有罪罪在朕躬古之畏天戒者不以移於股肱嗚呼書月食其亦足以戒乎

又曰孟康曰星入月而星見於月中是為星食月月掩星而星滅不見是為月食星隋天文志曰月食五

星歲以饑熒惑以亂填星以殺太白以強國戰辰以
女亂孝宣本始四年七月甲辰星在翼月犯之地
節元年正月戊午月食熒惑熒惑在角亢成帝建始
四年十一月食填星陽朔元年七月月犯心此其證
也

漢高祖七年月暈圍參畢七重占曰畢昴間天街也街
北胡也街南中國也昴為匈奴參為趙畢為邊兵是歲
高皇帝自將兵擊匈奴至平城為冒頓單于所圍七日

乃解

成帝建始元年八月戊午晨漏未盡三刻有兩月重見

京房易傳曰婦貞厲月幾望君子征凶

師古曰小畜上九爻辭也幾音

鉅依反

言君弱而婦彊為陰所乘則月並出晦而月見西

方謂之朏朔而月見東方謂之仄慝

孟康曰朏者月行疾在日前故早見

仄慝者行遲在日後當沒而更見師古曰朏音吐了反

仄慝則侯王其肅朏則侯

王其舒劉向以為朏者疾也君舒緩則臣驕慢故日行遲而月行疾也仄慝者不進之意君肅急則臣恐懼故

日行疾而月行遲不敢迫近君也不舒不急以正失之

者食朔日劉歆以為舒者侯王展意顛事臣下促急故

月行疾也肅者王侯縮胸不任事

服虔曰胸音忸怩之忸鄭氏曰不任事之

貌也師古曰胸音女六反

臣下弛縱故月行遲也

師古曰弛放也音式爾反當春

秋時侯王率多縮胸不任事故食二日反慝者十八食

晦日朏者一此其效也考之漢家食晦朏者三十六終

亡二日反慝者歆說信矣此皆謂日月亂行者也

哀帝時李尋上疏言月者衆陰之長銷息見伏百里

為品千里立表萬里連紀

品同也言百里內度數同也千里則當立表度其景

萬里則繼其本所起紀其宿度也

妃后大臣諸侯之象也朔晦正終

始弦為繩墨望成君德春夏南秋冬北間者月數以

春夏與日同道

孟康曰房有四星其間有三道春夏南行南頭第一星裏道也秋冬北行

北頭第一星裏道也與日同道者謂中

過軒轅上后

受氣

軒轅南大星為后

入太微帝廷揚光輝犯上將近臣列

星皆失色厭厭如滅此為母后與政亂朝陰陽俱傷

兩不相便外臣不知朝事竊信天文即如此近臣已

不足仗矣屋大柱小可為寒心唯陛下親求賢士無
彊所惡以崇社稷尊強本朝

光武建武八年三月庚子夜月暈五重紫微青黃似虹
有黑氣如雲月星不見丙夜乃解 中元元年十一月
甲辰月中星齒往來出入

桓帝永壽三年十二月壬戌月食非其時 延熹八年
正月辛巳月蝕非其時

獻帝興平二年十二月月在太微端門中重暈二珥兩

白氣廣八九寸貫月東西南北

魏文帝黃初四年十一月月暈北斗占曰有大喪赦天下七年五月帝崩明年即位大赦天下

晉懷帝永嘉五年三月壬申丙夜月食既丁夜又食既占曰月食盡大人憂又曰其國貴人死

海西公太和四年閏月乙亥月暈軫復有白暈貫月北暈斗柄三星占曰王者惡之六年桓溫廢帝

安帝隆安五年三月甲子月生齒占曰月生齒天子有

賊臣羣下自相殘桓元篡位之徵也 義熙九年十二

月辛卯朔月猶見東方是謂之反隱則侯王其肅是時

劉裕輔政威刑自己反隱之應云 十一年十一月乙

未月入輿鬼見而暈占曰王憂財寶出一日月暈有赦

月掩犯五緯

梁武帝太清二年五月兩月相承如鈎見於西方占曰
其國亂必見於亡國

簡文帝大寶元年正月丙寅月晝光於東方占曰月晝

光有隱謀國雄逃又云月晝明姦邪並作擅君之朝其
後景篡弒

西魏文帝大統十四年正月朔兩月並見

周武帝天和五年正月乙巳月在氐暈有白虹長丈所
貫之而有兩珥連接規北斗第四星占曰兵大起大戰
將軍死於野是冬齊師寇邊明年詔齊公憲率師禦之
自龍門渡河攻拔其新築五城兵大起大戰之應也

建德五年十月己未庚申月連暈規昴畢五車及參占

曰兵起爭地又曰王自將兵天下大赦 宣政元年正月丙子月食昴占曰有白衣之會又曰匈奴侵邊其月突厥寇幽州殺掠吏人五月帝北伐六月帝疾甚還京次雲陽而崩

隋煬帝大業九年正月二十七旦兩月並見

唐太宗貞觀初突厥有三月並出

高宗儀鳳二年正月甲子朔月見西方是謂朏朏則侯
王其舒

武太后時月過望不虧者二

元宗天寶三載正月庚戌月有紅氣如垂帶

肅宗至德元載建子月癸巳乙夜月掩昴而暈色白有
氣自北貫之昴胡也白氣兵喪建辰月丙戌月有黃白
冠連暈圍東井五諸侯兩河及輿鬼東井京師分也

代宗大歷十年九月戊申月暈熒惑畢昴參東及五車
暈中有黑氣乍合乍散十二月丙子月出東方上有白氣
十餘道如足練貫五車及畢觜觿參東井輿鬼柳軒轅中

夜散去占曰女主凶白氣為兵喪五車主庫兵軒轅為後宮其宿則晉分及京師也

憲宗元和十一年己未旦日已出有虹貫月於營室
文宗開成四年閏正月甲申朔乙酉月在營室正偃魄
質成早也占為臣下專恣之象 五年正月戊寅朔甲
申月昏而中未弦而中早也占曰同上

昭宗景福二年十一月有白氣如環貫月穿北斗連太
微 天復二年十二月甲辰夜月有三暈裏白中赤黃

外緣 天祐三年二月丙申月暈熒惑

梁太祖開平四年十二月庚午月食

唐莊宗同光三年三月戊申月食九月甲辰月食

明宗天成三年十二月乙卯月食 四年六月癸丑月

食既十二月庚戌月食既

晉高祖天福二年七月丙寅月食 五年十一月丁丑

月食

出帝開運元年三月戊子月食九月乙酉月食昴

漢高祖天福十二年十二月乙未月食

宋太祖乾德六年十一月庚寅 開寶二年十月戊子

三年四月乙酉 五年八月壬寅 七年八月庚寅

驗天不食

太宗太平興國二年六月甲辰既十一月壬寅 三年

十月丙寅雲陰不見 五年八月乙卯既 九年正月

丙寅 雍熙二年七月戊午驗天不食 四年五月丁

丑 端拱二年三月丁酉當食氏八度既驗天不食

淳化元年三月庚寅 二年八月壬午既 三年正月
癸卯八月丙子雲陰不見 五年六月乙未食九分占
云后妃臣下災明年孝章皇后崩十二月癸巳既占曰
大臣災明年春同知樞密院事劉昌言罷夏宰相呂蒙
正參知政事蘇易簡罷 至道元年六月己丑雲陰不
見十二月丁亥 二年十月辛亥

真宗咸平元年十月庚子 二年九月乙未 三年二
月壬戌八月庚申 四年八月甲寅 五年正月辛亥

七月戊申 六年正月甲辰七月壬寅占羌夷有兵明
年契丹大舉寇邊 景德元年十一月乙丑 二年五
月壬戌十月庚寅 三年十一月癸丑 四年五月辛
亥雲陰不見九月戊寅驗天不食 大中祥符元年九
月癸酉 二年九月丁卯驗天不食翼日上命辰也

三年閏二月甲子 五年正月甲申陰翳不見七月庚
辰十二月丁丑 八年十月辛卯 九年四月己丑雲
陰不見 天禧元年四月壬午十月庚辰 三年二月

壬寅 四年八月癸巳

仁宗天聖二年五月壬寅月當食不見 四年五月戊

午 慶歷二年六月丁亥食六分既而入濁不見復

五年四月庚子曉漏初食九月戊戌食六分欲復入雲

不見 六年九月壬辰食三分 皇祐二年七月庚子

四年十一月丙辰食未復而盡占曰后妃臣下裁後

二年貴妃張氏薨先是預詔日官以唐戊寅麟德大衍

五紀正元觀象宣明崇真及皇朝應天乾元儀天崇天

歷算此月太陰食分及辰刻分野 五年十月辛亥食

至和二年九月庚午食 三年八月甲子食既占曰

后宮宜崇德以致福 嘉祐二年二月壬戌食三分復

八月戊午 三年閏十二月辛巳食 四年六月戊寅

食幾盡十二月乙亥食既占曰月陰類后妃大臣之位

食則脩刑及兵今食既宜卹刑以除咎若三日有雨雪

則不占來年二月赦天下太子少傅王舉正卒 五年

十二月己巳 七年十月己丑皆食 八年十月癸未

食既卯初七刻食甚已而入濁不見

英宗治平元年四月庚辰食

神宗治平四年二月甲午月食丑之四刻虧見西方在翼十有五度至六刻食甚及八分彊至酉地入濁不見主飛蟲多死北夷有兵 熙寧元年七月乙酉月食丑之五刻在危十度虧見東北方食及二分半入濁不見食甚及復主齊分有喪大臣憂 二年閏十一月丁未月食亥之一刻虧見東方起東北至子之初刻食甚及

八分弱在井度中至三刻復主五穀不登 三年五月
乙巳月當食雲陰雨不見 四年五月己亥月食戌之
一刻虧見東南方出濁未圓六分在東井度中至五刻
復主大臣黜或宮中宜崇福十一月丙申月食卯之二
刻虧見西方起東南至六刻食甚及四分半弱在東井
一度少至明入濁不見復占同上 六年三月戊午月
食亥之一刻虧見東南六刻食甚及七分弱子之四刻
復九月乙卯月食丑之四刻虧見東北方至寅之一刻

食甚及六分涉已退未圓三分入濁不見復 七年九月已酉月食丑之一刻虧見正東方至六刻食既在婁二度弱至明刻不見復 九年正月壬申月食雲陰不見 十年正月丙寅月食子之三刻虧見東南方至七刻食甚及七分在張度中至丑三刻復主后有憂周地 貴人卒死及大戰拔城七月癸亥月食雲陰不見 元豐元年正月庚申月食有雲障之至丑五刻見西南方正東食及四分半寅初食既曉刻雲陰不見復主糴貴

周分貴人死六月戊午月食戌之一刻雲間見正東方
食及七分半至二刻食既在虛度中至亥三刻半復主
後宮憂大臣有咎齊分有喪 二年六月壬子月食雲
陰不見 三年十月甲戌月食既因雲陰不見 四年
四月辛未月食既自戌之二刻出濁已食甚月體東退
生光一分正西九分在尾度中至六刻復主后妃災十
月辛巳食於昏出濁食及七分在畢度中至二刻復主
有赦令邊臣有咎趙分有兵邊人有疫 五年十月癸

亥月食自酉之二刻虧見東北方至七刻食甚及三分
在昴七度太弱戌之三刻復主邊兵起或女主憂 六
年八月丁亥月食驗之不食 七年二月乙酉月食八
月辛巳月食皆雲陰不見 八年八月丙子月食戌之
三刻虧初至七刻蝕至子之一刻復

哲宗元祐元年十二月戊戌月蝕雲陰不見 三年六
月庚寅月蝕亥之五刻虧初至子六刻食既丑四刻復
在斗度中吳分主吳兵起大臣有憂十二月丁亥月食

雲陰不見 四年五月甲申月食初雲陰不見至丑初刻食已九分在斗度中吳分至六刻復主大臣憂有小兵 五年五月戊寅月食雲陰不辨虧蝕 六年四月癸卯月食雲陰不辨虧蝕 七年三月戊戌月食亥初一刻虧初至七刻食既于七刻復食甚在氐度中主大臣有憂十日內有風雨則解災 八年九月己丑月食雲陰不見 紹聖三年七月癸卯月食雲陰不見虧蝕 四年正月庚子月食雲陰不見初虧至酉七刻己食

三分戌一刻食及四分後復有雲障之主貴臣後宮有
憂周分民饑 五年五月壬戌月當食而不食 元符
二年五月丙辰月食子之三刻至丑二刻食既寅二刻
復在箕度中主御者或掌樂人當黜又為風十月甲寅
月食亥之四刻虧初至子四刻食既丑四刻復在參度
中主兵官當黜 三年十月戊申月食四分

徽宗崇寧二年二月甲子月食既主貴人當之八月辛
酉月食既主西方兵起 三年二月己未月食三分主

貴人當之八月丙辰月食四分主西方兵起 四年十

二月戊寅月食七分七主王者宮室不安 五年六月

乙亥月食九分主旱十二月壬申月食既主有女喪

大觀三年十月丙戌月食五分主有女喪 四年四月

甲申月食既九月庚辰月食既 政和元年三月戊寅

月食五分九月甲戌月食六分 三年六月丁酉月食

十分七月甲午月食八分主其下君憂或兵起 四年

正月辛卯月食主賤人當之 六年十一月乙巳月食

七分 七年十一月己亥月食 八年五月丙申月食
九分主旱 宣和二年三月丙辰月食三分主人主當
之 六年正月癸亥月食六分主賤人當之十二月戊
午月食既主有女喪

高宗建炎三年二月壬午望食於軫 紹興元年八月
己卯望當食雲陰蔽之 二年二月十四日丙子月體
如食太史言是謂月未當闕而闕七月十六日甲戌食
之既在室 三年七月戊辰望食於危 四年十二月

庚寅望食於井 五年十一月乙酉望食於井既 六
年五月十四日辛巳食於南斗十一月己卯望 八年
三月辛丑望九月丁酉望月皆食露雲不見 九年九
月壬辰望食於胃既 十二年七月丙午望當食露雲
不見 十三年六月庚子望食於虛既十二月戊戌望
當食露雲蔽之不見 十四年六月甲午望食於女
十五年五月己未望當食露雲不見 十六年四月甲
寅望食於尾 二十一年二月丙辰望當食露雲蔽不

見 二十五年五月壬戌望月食候之至酉以山色遮
映不見虧分 二十七年九月丁丑望食史失宿次
三十年正月甲午望

孝宗隆興二年五月己亥望 乾道元年四月甲午望
月當食露雲不見 四年二月望食於軫 五年二月

辛丑望 六年十一月丁酉望 八年六月壬子望

淳熙元年四月壬申望皆當食露雲不見 二年四月

丙寅望食於房既九月癸亥望 三年三月庚申望

五年二月己卯望皆當食霽雲不見 六年正月甲戌
望食於翼既 八年十一月丁亥望食於井 九年十
一月辛巳望食於井 十年五月己卯望食於箕 十
二年三月戊戌望食於亢九月乙未望 十三年三月
壬辰望皆當食霽雲不見八月丙寅食於奎既 十四
年八月甲申望 十六年十二月辛丑望

光宗紹熙元年乙未望 二年六月壬辰望 三年四
月乙巳望 五年九月癸卯望皆當食霽雲不見 慶

元二年八月壬戌望食於壁 三年七月己未望食於
翼既 四年七月庚戌望食於危 六年五月庚午望
寧宗嘉泰二年五月己未望 三年三月癸未望 開
禧元年三月壬申望閏八月己巳望皆當食陰雲不見
三年正月壬辰望食於張七月戊子望食於危 嘉
定元年二月丙戌望當食既雨不見十二月庚辰望食
於星 二年六月丁丑望食於女 三年十一月庚戌
望食於角八月丁未食於奎 八年八月辛丑望食於

壁 九年二月己亥望閏七月乙未望皆當食雲陰不
見 十年十二月戊午望食於柳 十一年六月乙卯
望食於牛十二月壬子食於井 十二年五月庚戌望
當食既霽雲不見十一月丙午望食於井 十三年五
月甲辰望食霽雲不見 十四年十月丙寅望食於胃
十五年三月癸卯望食於氐霽雲不見 十六年三
月丁巳望當食霽雲不見

月輝月暈

建隆元年訖開寶末凡珥一十九輝氣一十三暈二十九重暈一半暈一十四交暈二紐氣二

太平興國元年訖至道凡冠氣一珥六輝氣五赤氣二抱氣一暈八半暈二背氣一

咸平元年訖乾興末凡重輪三珥一百二十冠氣十一輝氣二承氣八抱氣三戴氣九赤黃氣十七五色氣十一赤青氣二黃紅氣一暈三百九十四五色重暈二十背氣一

天禧四年四月乙酉西南方兩月重見占大臣爭權有
誅又曰有大水其年秋宰相寇準以罪貶滑州河決京
師大雨壞廬舍

天聖元年訖嘉祐末月凡揚光一光芒氣一紅光輝氣
一五色暈氣一暈二百五十七周暈三十三交暈四連
環暈一珥七十三冠氣五戴氣一十三承氣五背氣一
白虹貫月一黃虹貫月二

治平元年訖四年五色輝氣一五色暈氣一暈五十一

珥一十五冠氣一戴氣四背氣三

治平四年訖元豐末凡月五色輝氣十一五色暈氣六
暈四百六十三周暈二百四十七交暈二珥一百三十
四冠氣七戴氣五十承氣五背氣一十白虹貫月五貫
珥一

元豐八年三月五日至元符三年正月十二日凡月五
色暈氣九暈八十九周暈三百五十一重暈一交暈三
珥一百三冠氣十戴氣二十七背氣八白虹貫月二貫

珥一

元符三年正月訖靖康二年四月凡月暈珥二五色暈
五珥二暈冠一交暈一白虹貫月一五色暈一

建炎四年十月己卯月生五色暈占人主有後宮喜次
年張媿好吳才人進封 紹興二年二月丙子月未當
闕而闕體如蝕色赤黃占大臣黜又曰臣下不奉法侵
奪主勢於是張俊專制於蜀始議召歸 四年六月壬
午月暈而珥占期六十日兵起十一月壬申月色無光

五年正月戊午月暈於東井占有邊兵一曰敵國求和

嘉泰三年七月壬午白虹如半暈穿貫月中占曰白虹貫月大兵將起軍戰於野

凡日傍一珥軍喜二珥民壽三珥后喜四珥立侯王及子孫喜戴者推德抱者國降承者臣承君喜冠者封建暈珥為忿爭半暈纓得地直為自立交為大戰背為背叛戟為兵鬪貫刺君惡若在月則應后妃五色雲為慶

雲太平之應見則國有慶

容齋洪氏隨筆曰歷家論日月食自漢太初以來始定日食不在朔則在晦否則二日然甚少月食則有十四十五十六之差蓋置望參錯也天體有二交道曰交初曰交中文初者星家以為羅睺交中者計都也隱暗不可見於是為入交法以求之然不過能求朔望耳若餘日入交則書所不載由漢及唐二十八家暨本朝十一歷皆然姑以慶元丁

已歲五次月食考之二月望為入交中七月為交
初唯十月二十日二十一日連兩夜乃以二更盡
月食之既纔兩刻復明十一月十八夜復如之按
此三食皆是交中十月二十夜月在張五度而計
都在翼二度次夜月在張十七度計都未動相距
才四度耳十一月十八夜月在星五度計都在張
十九度相距二十度十二月十七夜五更月在星
二度入交陽末卯初四刻交甚食六分半八刻退

交十八夜四更月在張六度入交中陰初至寅四刻交甚食九分卯五刻退交其驗如此予竊又有疑焉太陰一月一周天必兩值交道今年遂至八食一一如星官歷翁之說仍不拘月望則玉川子之詩不勝作矣當更求其旨趣云頃見太史局官劉孝榮言月本無光受日為明望夜正與日對故一輪光滿或月行有遲疾先後日光所不照處則為食朔旦之日日月同宮如月在日上掩太陽而

過則日光為所遮故為日食非此二日則無薄蝕之理其說亦通

又夷堅志紹興三十二年正月予被命接伴北使次盱眙天文官荆大聲隨行見向西邊大星去月三寸許指示予曰此木星也或食月或為月所食少刻便可決予質其義曰月體自若而星居月上此為星食月月遇之而星隱不見此為月食星既而仰視高空失星所在俄出於月東問其兆應如

何唯唯不肯說至四月半予報聘偕荆行荆出一書大抵皆星氣占驗其一曰月星相食當有易主事時已竊聞將有堯禪舜之舉矣予按景祐乾象新書引晉書月蝕歲星野有逐相又引天文總論曰主殺戮將相王侯之象或其分有兵喪其說淺矣五月十六日五更初過臨淮境瞻月外有環暈五重附近者紫紅色白者次之青者又次之黃者又次之最外深紅各相去一丈分寸不差忒其圓

如規馬上諦視起敬荆馳至旁附耳曰是為月重
輪前史所紀多不過兩三重而今五數但太陰極
盛恐非太陽之利耳將曉乃沒未一月而高宗遜
位乾道二年六月北極前星之左有小星大聲謂
予向者不記有此星若本無而今有懼為東宮禍
三年又指軒轅星之側客星曰非中宮福已而皆
然八月中蒙宣對便殿孝宗聖意悲哽邁輒奏大
聲之說以為上穹默定久矣乞少寬宸抱上固素

諳星象慘然曰朕亦見之時大聲浮湛廬市遂遭
逢今以春官大夫判太史局

文獻通考卷二百八十五

欽定四庫全書

文獻通考卷二百八十六

鄱陽馬端臨貴與著

象緯考九

孛彗

春秋魯文公十四年秋七月有星孛入於北斗

孛彗也既見而

移入北斗非常所有故書之

左傳周內史叔服曰不出七年宋齊晉

之君皆將死亂

後三年宋弒昭公五年齊弒懿公七年晉弒靈公史服但言事徵而不論其占

固非末學所得詳言公羊傳字者何彗星也狀如其言入於北斗

何據大辰不言入北斗有中魁中者何以書記異也字者

邪亂之氣彗者穀梁傳字之為言猶第也其曰入北斗

斗有環域也據字於大辰及東方皆不言入此言入者

星人君之象也彗星亂臣之類言邪亂之臣將弑君

昭公十年冬有星孛於大辰大辰房尾也傳曰有星孛於大

辰西及漢夏之八月辰星見在天漢西今字星出辰西

申須曰彗所以除舊布新也申須魯大夫彗似天事恒

象

天道恒以象類告示人

今除於火火出必布焉諸侯其有火災

乎

今火向伏故知當須火出乃布散為災向許亮反又作嚮

梓慎曰往年吾見之是

其徵也

徵始有形象而著也

火出而見

前年火出時見賢遍反下及注同

今茲火

出而章必火入而伏

隨火沒也

其居火也久矣

歷二年

其與不

然乎

言必然也與如字又音預

火出於夏為三月

謂昏見

於商為四月

於周為五月夏數得天

得天正

若火作其四國當之在宋

衛陳鄭乎宋大辰之虛也

大辰大火宋分野

陳太皞之虛也

太皞

居陳木火所自出

鄭祝融之虛也

祝融高辛氏之火正居鄭

皆火房也

房舍也

星字及漢漢水祥也

水也

衛顛頊之虛也故為帝邱

衛今

濮陽縣昔帝顛頊居之其城內有顛頊冢濮音卜

其星為大水

衛星營室營室水也

水火

之牡也

牡雄也牡茂后反

其以丙子若壬午作乎水火所以合

也

丙午火壬子水水火合而相薄水少而火多故水不勝火薄本又作搏音搏

若火入而伏

必以壬午

尚未知今字星當復隨火星俱伏不故言若復扶又反

不過其見之月

火在周之五月公羊傳其言如大辰何

據北斗言入於大辰非常名

在大辰

也大辰者何大火也

謂大火

大火為大辰伐為大辰

伐謂參伐

也大火與伐天所以示民時早晚天下所取正故謂之大辰辰時也

北辰亦為大辰

北辰北極

天之中也常居其所迷惑不知東西者須視北
辰以別心伐所在故加亦亦者兩相須之意也 二十六

年齊有彗星

出齊之分野不書魯不見彗

齊侯使禳之晏子曰無益

也祇取誣焉

誣欺也

天道不諂不貳其命

諂疑也

若之何禳

之且天之有彗也以除穢也君無穢德又何禳焉若德
之穢禳之何損

哀公十三年冬十一月有星孛於東方

平旦衆星皆沒而孛乃見故不

言所在之次

公羊孛者何彗星也其言於東方何據北斗言星名也

見於旦也

旦者日方出時宿不復見故言東方知為旦

貞定王二年彗星見

先公曰史表稱彗見於秦愚按春秋終於魯哀公之十四年而麟獲於魯左傳終於魯哀公之二十六年明年而彗見於秦天人之理何其昭昭也秦人亡二周滅六國包舉宇內并吞八荒廢井田開阡陌埽除先王之典籍彗之為禍烈矣表彗見以為傳鑑補遺之首書

考王八年彗星見

赧王十年彗星見 十二年彗星見 十九年彗星見
秦始皇七年彗星先出東方見北方五月見西方十六
日 九年彗見或竟天四月見西方又見北方從斗以
南八十日 十三年正月彗星見東方 三十三年明

星出西方

徐廣曰皇甫謐云彗星也

漢天文志秦始皇之時十五年間彗星四見久者八
十日長或竟天後秦遂以兵兼六國外攘夷狄死人
如麻

漢高帝三年七月有星孛於大角旬餘乃入劉向以為是時項羽為楚王伯諸侯而漢已定三秦項羽相距滎陽天下歸心於漢楚將滅故彗除王位也一曰羽阬秦卒燒宮室弑義帝亂王位故彗加之也

文帝後七年有星孛於西方其本直尾箕末指虛危長丈餘及天漢十六日不見劉向以為尾宋地今楚彭城也箕為燕又為吳越齊宿在漢中負海之國水澤地也是時景帝新立信用鼂錯將誅正諸侯其象先見後三

年七國反皆誅滅云

孝景二年彗星出西南其三年吳楚七國反 中三年
三月丁酉彗星見西北其色白長丈在觜觿且去益小
十五日不見占曰必有破國亂君伏死其辜觜觿梁也
其年梁王得罪

孝武建元三年二月有星孛於注張歷太微干紫宮至
於天漢春秋星孛於北斗齊魯晉之君皆將死亂今星
孛歷五宿其後濟東膠西江都王皆坐法削黜自殺淮

南衡山反誅 三年四月有星孛於天紀至織女占曰
織女有女變天紀為地震至四年十月而地動其後陳
皇后廢 六年六月有星孛於北方劉向以為明年淮
南王安有邪謀而陳皇后驕恣其後廢后王誅八月長
星出於東方長終天三十日去占曰是為蚩尤旗見則
王者征伐四方其後兵誅四夷連數十年 元狩四年
四月長星又出西北是時代胡尤甚

班固曰建元六年蚩尤之旗見其長竟天後遂命將

出征畧取河南建置朔方其春戾太子生自是之後
師行三十年所誅屠夷滅死者不可勝數及巫蠱事
起京師流血僵尸數萬太子子父俱敗故太子生長
於兵與之終始何獨一嬖臣哉

劉奉世曰按武紀建元六年長星見更元

光至元朔元年春戾太子始生贊殊為乖誤

元封元年五月有星孛於東井又孛於三台其後江充
作亂京師紛然此明東井三台為秦地效也 元封中
星孛於河戍占曰南戍為越門北戍為胡門其後漢兵

擊拔朝鮮以為樂浪元菟郡朝鮮在海中越之象也居
北方胡之域也 太初中星孛於招搖星傳曰客星守
招搖蠻夷有亂民死君其後漢兵擊大宛斬其王招搖
遠夷之分也

宣帝地節元年正月有星孛於西方去太白二丈所劉
向以為太白為大將彗孛加之埽滅之象也明年大將
軍霍光薨後二年家夷滅

元帝初元五年彗星出西北赤黃色長八尺所後數日

長丈餘東北指在參分後二歲餘西羌反

成帝建始元年正月有星孛於營室青白色長六七丈
廣尺餘劉向谷永以為後宮懷妊之象彗星加之將有
害懷妊絕繼嗣者一曰後宮將受害也其後趙皇后立
妹為昭儀害兩皇子上遂無嗣趙后姊妹卒皆伏誅

元延元年七月辛未有星孛於東井踐五諸侯

孟康曰五諸侯

名星出河戍北率行軒轅太微後日六度有餘晨出東方

十三日夕見西方犯次妃長秋斗填蠱災再貫紫宮中

大火當後達天河除於妃后之域南逝度犯大角攝提
至天市而按節徐行服虔曰謂行遲炎入市中旬而後西去五

十六日與蒼龍俱伏谷永對曰上古以來大亂之極所

希有也察其馳騁驟步芒炎或長或短所歷奸犯師古曰奸

音干內為後宮女妾之害外為諸夏叛逆之禍劉向亦曰

三代之亡攝提易方秦項之滅星孛大角是歲趙昭儀

害兩皇子後五年成帝崩昭儀自殺哀帝即位趙氏皆

免官爵徙遼西哀帝無嗣平帝即位王莽用事追廢成

帝趙皇后哀帝傅皇后皆自殺外家丁傅皆免官爵徙合浦歸故郡平帝無嗣莽遂篡國

哀帝建平二年二月彗星出牽牛七十餘日傅曰彗所以除舊布新也牽牛日月五星所從起歷數之元三正之始彗而出之改更之象也其出久者為其事大也其六月甲子夏賀良等建言當改元易號增漏刻詔書改建平二年為太初元年號曰陳聖劉太平皇帝漏刻以百二十為度八月丁巳悉復蠲除之賀良及黨與皆伏

誅流放其後卒有王莽篡國之禍

王莽地皇三年十一月有星孛於張東南行五日不見孛星者惡氣所生為亂兵或謂之彗星所以除穢而布新也張為周地星孛於張東南行即軫翼之分軫翼為楚是周楚地將有兵亂後一年正月光武起兵春陵破南陽更始為天子都雒陽西入長安光武興河北復都雒陽居周地除穢布新之象

光武建武十五年正月丁未彗星見昴

炎長三文韓楊占曰在昴大國

起兵也 稍西北行入營室犯離宮 韓楊占曰彗出營室東壁之間為兵起也 三

月乙未至東壁滅見四十九日彗星為兵入除穢昴為邊兵彗星出之為有兵至十一月定襄都尉陰承反太守隨誅之盧芳從匈奴入居高柳至十六年十月降上璽綬一曰昴星為獄事是時大司徒歐陽歙以事繫獄踰歲死營室天子之常宮離宮妃后之所居彗星入營室犯離宮是除宮室也是時郭皇后已疏至十七年十月遂廢為中山太后立陰貴人為皇后除宮之象 三

十年閏月甲午水星在東井二十度生白氣東南指炎
長五尺為彗東北行至紫宮西藩上五月甲子不見凡
見三十一日水常以夏至放於東井閏月在四月尚未
當見而見是贏而進也東井為水衡水出之為大水是
歲五月及明年郡國大水壞城郭傷禾稼殺人民白氣
為喪有災作彗彗所以除穢紫宮天子之宮彗加其藩
除宮之象

荆州星經曰彗在東井國大人死七十日後
主當之五十日相當之三十日兵將當之後

三年光武帝崩

孝明帝永平三年六月丁卯彗星出天船北長二尺所
稍北行至亢南百三十五日去天船為水彗出為大水
是歲伊雒水溢到津城門壞伊橋郡七縣三十二皆大
水 八年六月長星出柳張三十七度犯軒轅刺天船
陵太微氣至上階凡見五十六日去柳周地是歲多雨
水郡十四傷稼 十八年六月己未彗星出張長三尺
轉在郎將南入太微皆屬張張為周地東都太微天子
廷彗星犯之為兵喪其八月帝崩

孝章建初元年八月庚寅彗星出天市長二尺所稍行
入牽牛三度積四十日稍減十二月戊寅彗星出婁三
度長八九尺稍入紫宮中百六日減為大人忌後四年
明德皇后崩

孝安永初三年十二月彗星起天苑南東北指長六七
尺色蒼白天苑為外軍彗星出其南為外兵其後任尚
馬賢等擊羌降之

孝順永建六年彗星出於斗牽牛滅於虛危虛危為齊

牽牛吳越故海賊浮於會稽山賊捷於濟南 六年二

月丁巳彗星見東方長六七尺色青白西南指營室及

墳墓星

郝萌占曰彗星出而中營室天下亂易政以五色占其吉凶

丁丑彗星在奎

一度長六尺癸未昏見

河圖曰彗星出貫奎庫兵悉出禍在強侯外夷胡應逆首誅也

西北歷昴畢甲申在東井遂歷輿鬼柳七星張光炎及

三台至軒轅中滅

古今注曰五月庚寅太白晝見十一月甲午太白晝見

營室者

天子常宮墳墓主死彗星起而在墳墓營室不出五年

天下有大喪後四年孝順帝崩昴為邊兵又為趙羗周

馬父子後遂為寇又劉文刦清河相謝暉欲立王蒜為天子暉不聽殺暉王閉門距文官兵捕誅文蒜以惡人所刦廢為尉氏侯又徙為犍陽都鄉侯薨國絕歷東井輿鬼為秦皆羗所攻鈔炎及三台為三公是時太尉杜喬及故太尉李固為梁冀所陷入坐文書死及至注張為周滅於軒轅中為後宮其後懿獻后以憂死梁氏被誅是其應也

孝桓建和元年八月乙丑彗星芒長五尺見天市中東

南指色黃白九月戊辰不見時梁冀驕亂 延熹四年
五月辛酉客星在營室稍順行生芒長五尺所至心一
度轉為彗占為大喪後四年鄧氏以憂死

孝靈光和元年八月彗星出亢北入天市中長數尺稍
長至五六丈赤色經歷十餘宿八十餘日乃消於天苑
中彗除天市天帝將徙帝將易都至初平元年獻帝遷
都長安 三年冬彗星出狼弧東行至於張乃去張為
周地彗星犯之為兵亂後四年京都大發兵擊黃巾賊

七月彗星出三台下東行入太微至太子幸臣二十餘日而消彗入太微天下易主至中平六年宮車晏駕

光和五年二月彗星出奎逆行入紫宮後三出六十餘日乃消占曰彗除紫宮天下易主

孝獻初平三年九月蚩尤旗見長十餘丈色白出角亢之南占曰蚩尤旗見則王征伐四方其後曹公征討天下且三十年 四年十月孛星出兩角間東北行入天市中而滅占曰彗除天市天帝將徙帝將易都是時上

在長安後二年東遷明年七月至雒陽其八月曹公迎
上都許 建安五年十月辛亥有星孛於大梁冀州分
也時袁紹在冀州其年十一月紹軍為曹軍所破七年
夏紹死後曹公遂取冀州 九年十一月有星孛於東
井輿鬼入軒轅太微 十一年正月星孛於北斗首在
斗中尾貫紫宮及北辰占曰彗星掃太微宮人主易位
其後魏文帝受禪 十二年十月辛卯有星孛於鶉尾
荊州分也時荊州牧劉表據荊州時益州從事周羣以

荊州牧將死而失土明年秋表卒以少子琮自代曹公將伐荊州琮懼舉軍詣公降 十七年十二月有星孛於五諸侯周羣以為西方專據土地者皆將失土時益州牧劉璋據益州漢中太守張魯別據漢中韓遂據涼州宋建別據枹罕明年冬曹公遣偏將擊涼州十九年獲宋建韓遂逃於羌中病死其年璋失益州二十年秋公攻漢中魯降 二十三年三月孛星辰見東方二十餘日夕出西方犯歷五車東井五諸侯文昌軒轅后妃

太微鋒炎指帝座占曰除舊布新之象也

魏文帝黃初六年十月乙未有星孛於少微歷軒轅占
為兵喪除舊布新之象時帝軍廣陵辛丑親御甲冑觀
兵明年五月帝崩

明帝太和六年十一月丙寅有星孛於翼近太微上將
星占曰為兵喪甘氏曰孛彗所當之國是受其殃翼又
楚分野孫權封略也明年權有遼東之敗又明年諸葛
亮入秦川孫權發兵緣江淮屯要衝權自圍新城以應

亮天子東征權 青龍四年十月甲申有星孛於大辰
長三尺乙酉又孛於東方十一月己亥彗星見犯宦者
天紀星占曰大辰為天王天下有喪劉向五紀論曰春
秋星孛於東方不言宿者不加宿也宦者在天市為中
外有兵天紀為地震孛彗主兵喪 景初二年八月彗
星見張長三尺逆西行四十一日滅占同上張周分野
少帝正始元年十月乙酉彗星見西方在尾長二丈拂
牽牛犯太白十一月甲子進犯羽林占曰尾為燕又為

吳牛亦吳越之分太白為上將羽林為中軍兵為吳越
有喪中軍兵動二年五月吳遣三將寇邊吳太子登卒
六月宣帝討諸葛恪於皖太尉滿寵薨 六年八月戊
午彗星見七星長二尺色白進至張積二十三日滅
七年十一月癸亥又見軫長一尺積五十六日滅 九
年三月又見昴長六尺色青白芒西南指七月又見翼
長二尺進至軫積四十二日滅按占曰七星張為周分
野翼軫為楚昴為趙魏彗所以除舊布新主兵喪也嘉

平元年宣帝誅曹爽兄弟又其黨與皆夷三族京師嚴
兵三年誅楚王彪又襲王凌於淮南淮南東楚也魏諸
王幽於鄴 嘉平三年十一月癸亥有星孛於營室西
行積九十日滅占曰有兵喪室為後宮後宮有亂 四
年二月丁酉彗星見西方在胃長五六丈色白芒南指
貫參積二十日滅 五年十一月彗星又見軫長五丈
在太微左執法西南指積百九十日滅按占曰胃兗州
之分野參主兵太微天子庭執法為執政孛彗為兵喪

除舊布新之象正元元年二月李豐豐弟翼后父張緝等謀亂皆誅皇后亦廢九月廢帝為齊王

高貴鄉公正元元年十一月白氣出南斗側廣數丈長竟天王肅曰蚩尤之旗也東南其有亂乎二年正月有彗星見於吳楚分西北竟天鎮東大將軍毋邱儉等據淮南叛景帝討平之按占蚩尤旗見王者征伐四方自後又征淮南西平巴蜀是歲吳主孫亮立

吳五鳳元年長星見斗牛吳越分按占吳有兵喪除舊

布新之象也太平三年孫綝盛兵圍宮廢亮為會稽王
故國志又書於吳也淮南江東同揚州地故於時變見
吳楚之分則魏之淮南多與吳同其災是以母邱儉等
以字為已應遂起兵而敗後三年即魏甘露二年諸葛
誕又反淮南吳遣將救之及城陷誕眾與吳兵死沒各
數萬人猶前長星之應也

魏甘露二年十一月彗星見角色白占曰彗星見兩角
間色白者軍起不戰邦有大喪景元元年高貴鄉公為

成濟所害

元帝景元三年十一月壬寅彗星見亢色白長五寸轉北行積四十五日滅占曰為兵喪一曰彗星見亢天子失德四年鍾會鄧艾伐蜀剋之二將俱以反誅 咸熙二年五月彗星見王良長丈餘色白東南指積十二日滅占曰王良天子御駟彗星掃之禪代除舊布新之象也白色為喪王良在東壁宿又并州之分野八月元帝崩十二月武帝受魏禪

晉武帝泰始四年正月丙戌彗星見軫青白色西北行
又轉東行占曰為兵喪軫又楚分野三月皇太后王氏
崩十月吳寇江夏襄陽 五年九月星孛於紫宮占如
上紫宮天子內宮十年武元楊皇后崩 十年十二月
有星孛於軫占曰天下有兵起軫又楚分野 咸寧二
年六月甲戌星孛於氐占曰天子失德易政氐又兗州
分七月星孛於大角大角為帝座八月星孛於太微至
翼北斗三台占曰太微天子庭大人惡之一曰有改王

翼又楚分野北斗主殺罰三台為三公 三年正月星
孛於西方三月星孛於胃胃徐州分四月星孛於女御
女御為後宮五月又孛於東方七月星孛紫宮占曰天
下易主 四年四月蚩尤旗見東井後年傾三方伐吳
是其應也 五年三月星孛於柳四月又孛於女御七
月孛於紫宮占曰外臣陵主柳又三河分野大角太微
紫宮女御並為王者明年吳亡是其應也孛主兵喪征
吳之役三河徐兗之兵悉起交戰於吳楚之地吳丞相

都督以下梟戮十數偏裨行陣之徒馘斬萬計皆其徵也 太康二年八月有星孛於張占曰為兵喪十一月星孛於軒轅占曰後宮當之 四年三月戊申星孛於西南是年齊王攸任城王陵琅琊王佃新都王詠薨 八年九月星孛於南斗長數十丈十餘日滅占曰斗主爵祿國有大憂一曰孛於斗王者疾病天下易政大亂兵起 永熙元年四月客星在紫宮占曰為兵喪太康末武帝耽宴遊多疾病是月己酉帝崩元康元年賈后

誅楊駿及其黨與皆夷三族楊太后亦見弑又誅汝南王亮太保衛瓘楚王瑋王室兵喪之應也

惠帝永康五年四月有星孛於奎至軒轅太微經三台大陵占曰奎為魯又為庫兵軒轅為後宮太微天子庭三台為三司大陵有積尸死喪之事其後武庫火西羌反後五年司空張華遇禍賈后廢死魯公賈謚誅又明年趙王倫篡位於是三王興兵討倫兵士戰死十餘萬人永康元年十二月彗星出牽牛之西指天市占曰

牛者七政始彗出之改元易號之象也天市一名天府
一名天子旗帝座在其中明年趙王倫篡位改元尋為
大兵所滅 二年四月彗見齊分占曰齊有喪時齊王
冏起兵討趙王倫倫滅冏明年復敗 泰安元年四月
彗星晝見 二年三月彗見東方指三台占曰兵喪象
三台為三公三年正月東海王越執太尉長沙王又張
方又殺之 永興二年八月有星孛於昴畢占曰為兵
喪昴畢又趙魏分野十月丁丑有星孛於北斗占曰旋璣

更授天子出走又曰彊國發兵諸侯爭權是後諸王交兵
皆有應明年惠帝崩

成帝咸和四年七月有星孛於西北犯斗二十三日滅
占曰為兵亂十二月郭默殺江州刺史劉允荊州刺史
陶侃討默斬之時石勒又始僭號 咸康二年正月辛
巳彗星夕見西方在奎占曰為兵喪奎又為邊兵三年
正月石季龍僭天王位四年石季龍伐慕容皝不克既
退皝追擊之又破麻秋時皝稱蕃邊兵之應也 六年

二月庚辰有星孛於太微七年三月杜皇后崩

康帝建元元年十一月六日彗星見亢長七尺白色占
曰亢為朝廷主兵喪二年康帝崩

穆帝永和五年十一月乙卯彗星見於亢芒西向色白
長一丈 六年正月丁丑彗星又見於亢占曰為兵喪
疾疫其五年八月褚裒北征兵敗十一月冉閔殺石遵
又盡殺胡十餘萬人於是中土復大亂十二月褚裒薨
是年大疫 升平二年五月丁亥彗星出天船在胃占

曰為兵喪除舊布新出天船外夷侵一曰為大水四年五月天下大水五年穆帝崩

哀帝興寧元年八月有星孛於角亢入天市按占曰為兵喪三年正月皇后王氏崩二月帝崩慕容恪攻沒洛陽沈勁等戰死

孝武寧康元年正月丁巳有星孛於女虛經氐亢角軫翼張至二月丙戌彗星見於氐九月丁丑有星孛於天市占曰為兵喪太元元年七月苻堅破涼州虜張天錫

太元十五年七月壬申有星孛於北河或經太微三
台文昌入北斗色白長十餘丈八月戊戌入紫微乃滅
占曰北河或一名胡門胡門有兵喪掃太微入紫微王
者當之三台為三公文昌為將相將相三公有災入北
斗諸侯戮一曰掃北斗強國發兵諸侯爭權大人憂二
十一年帝崩隆安元年王恭殷仲堪桓元等發兵請誅
王國寶朝廷從而殺之司馬道子由是失勢禍亂成矣
安帝隆安四年二月己丑有星孛於奎長三丈上至閣

道紫宮西蕃入北斗魁至三台三月遂經於太微帝座
端門占曰彗星掃天子庭閣道易主之象也經三台入
北斗占同上條十二月戊寅有星孛於貫索天市天津
占曰貴臣獄死内外有兵喪天津為賊斷王道天下大
動按占災在吳越五年二月有孫恩兵亂攻侵郡國於
是内外戒嚴營陣屯守柵斷淮口九月桓元表至逆謀
陵上其後元遂篡位亂京都大饑人相食百姓流亡皆
其應也 義熙十一年五月甲申彗星二出天市掃帝

座在房心北房心宋之分野按占得彗柄者興除舊布
新宋興之象 十四年五月庚子有星孛於北斗魁中
七月癸亥彗星出太微西柄起上相星下芒漸長至十
餘丈進掃北斗紫微中台占曰彗出太微社稷亡天下
易主入北斗紫微帝宮空十四年劉裕還彭城受宋公
十二月安帝崩

恭帝元年正月戊戌有星孛於太微西蕃占曰革命之
徵其年宋有天下

宋武帝永初三年二月丙戌有星孛於虛危十一月戊午有星孛於營室

少帝景平元年正月乙卯有星孛於東壁十月己未有星孛於氐

文帝元嘉十九年九月丙辰有客星在北斗因為彗入文昌貫五車掃畢拂天節經天苑季冬乃滅 二十六年十月癸卯彗星見於太微 二十八年四月乙卯彗星見於昴六月壬子見太微中對帝座次年元凶劬構

逆帝崩

齊東昏侯永元三年正月乙巳長星見竟天二月壬戌

蚩尤旗見

和帝中興元年三月乙巳彗星竟天

梁武帝中大通五年正月己酉長星見 大同五年十

月辛丑彗出南斗長一尺餘東南指漸長一丈餘十一

月乙卯至婁滅占曰天下有謀王者其八年正月安成

民劉敬躬挾左道反黨與數萬九年李賁稱皇帝於交

州

陳文帝天嘉元年九月癸丑彗星長四尺芒指西南占
曰彗星見則敵國兵起得本者勝其年周將獨孤盛領
衆趣巴湘侯瑱襲破之 六年六月辛酉有彗長丈餘
見於上台占曰陰謀姦宄起一曰宮中火起其後帝崩
安成王廢少帝而自立陰謀之應也

廢帝光大二年六月丁亥彗星見

宣帝大建七年四月丙戌有星孛於大角占曰人主亡

十二年十二月辛巳彗星見西南占曰有兵喪明年
帝崩始興王叔陵作亂

後魏明元帝泰常元年五月甲申彗星二見

北齊武成帝河清四年三月彗星見占曰除舊布新易
王至四月傳位太子

後主天統元年六月壬戌彗星出文昌東北其大如手
後移長乃至丈餘百日乃滅 四年彗星見於東井七
月孛星見房心白如粉絮大如斗東行八月入天市漸

長四丈犯瓠瓜歷虛危入室犯離宮九月入奎至婁而滅孛者孛亂之氣占曰兵喪並起易政大臣誅其後太上皇崩至武平二年琅琊王儼矯詔誅尚書和士開既而殺儼

周武帝保定五年六月庚申彗星出三台入文昌犯上將後經紫宮西垣入危漸長一丈餘指室壁後百餘日稍短長二尺五寸滅虛危齊之分野天和三年六月甲戌彗見東井長一丈上白下赤而光漸東行至七月

癸卯在鬼北八寸所乃滅占曰為兵國政崩壞將軍死
大臣誅 建德三年四月乙卯有星孛於紫宮垣外大
如拳色赤白指五帝座漸東南行稍長一丈五尺五月
甲子至上台北乃滅占曰天下易政無德者亡後二年
帝滅齊

隋文帝開皇八年十月甲子有星孛於牽牛占曰臣殺
君天下合謀內不有大亂則外有大兵牛吳越之星陳
之分野後年陳氏滅 十四年十一月癸未有彗星孛

於虛危及奎婁齊魯之分野其後魯公虞慶則伏法齊
公高頰除名

煬帝大業三年二月乙丑彗星見於東井文昌歷大陵
五車北河入太微掃帝座前後百餘日而止三月辛亥
長星見西方竟天干歷奎婁角亢而沒至九月辛未轉
見南方亦竟天干角亢頰掃太微帝座干犯列宿唯
不及參井經歲乃滅占曰去穢布新天所以去無道建
有德見久者災深星大者事大行遲者期遠兵大起國

大亂而亡餘殃為水旱饑饉土功疾疫其後築長城討吐渾及高麗兵戎連歲水旱疾疫土功相仍羣盜并起邑落空虛 四年彗星出五車掃文昌至房而滅 十一年六月有星孛於文昌東南長五六寸色黑而銳夜動搖西北行數日至文昌去宮四五寸不入却行而滅占曰為急兵其八月突厥圍帝於鴈門矢及帝前 十三年六月有星孛於太微五帝座色黃赤長三四尺所數日而滅占曰有亡國殺君明年三月宇文化及弑帝

九月彗見於營室

唐高祖武德九年二月壬午有星孛於胃昴間丁亥孛於卷舌孛與彗皆非常惡氣所生而孛災甚於彗

太宗貞觀八年八月甲子有星孛於虛危歷元枵乙亥不見十三年三月乙丑有星孛於畢昴十五年六月己酉有星孛於太微犯郎位七月甲戌不見

高宗龍朔三年八月癸卯有彗星於左攝提長二尺餘乙巳不見攝提建時節大臣象乾封二年四月丙辰

有彗星於東北在五車畢昴間乙亥不見 上元二年
十二月壬午有彗星於角亢南長五尺 三年七月丁
亥有彗星於東井指北河長三尺餘東北行光芒益盛
長三丈掃中台指文昌九月乙酉不見東井京師分中
台文昌將相位兩河天闕也 開耀元年九月丙申有
彗星於天市中長五丈漸移東行至河鼓癸丑不見市
者貨食之所聚以衣食生民者一曰帝將遷都河鼓將
軍象 永淳二年三月丙午有彗星於五車北四月辛

未不見

中宗光宅元年九月丁丑有星如半月見於西方月衆陰之長星如月者陰盛之極 文明元年七月辛未夕

有彗星於西方長丈餘八月甲辰不見是謂天欖 景

龍元年十月壬午有彗星於西方十一月甲寅不見

二年二月丁酉有星孛於胃昴間胡分也八月壬辰有星孛於紫宮

睿宗太極元年六月有彗星自軒轅入太微至大角滅

元宗開元十八年六月甲子有彗星於五車癸酉有星
孛於畢昴 二十六年三月丙子有星孛於紫宮垣歷
北斗魁旬餘因雲陰不見

肅宗乾元三年四月丁巳有彗星於東方在婁胃間色
白長四尺東方疾行歷昴畢觜觿參東井輿鬼柳軒轅
至右執法西凡五旬餘不見閏月辛酉朔有彗星於西
方長數丈至五月乃滅婁為魯胃昴畢為趙觜觿參為
唐東井輿鬼為京師分柳其半為周分二彗仍見者荐

禍也又婁胃間天倉

代宗大歷元年十二月己亥有彗星於瓠瓜長尺餘經
二旬不見犯宦者星 五年四月己未彗星於五車
光芒蓬勃長三丈五月己卯彗星見於北方色白癸未
東行近八穀中星六月癸卯近三公己未不見占曰色
白者太白所生也 七年十二月丙寅有長星於參下
其長亘天長星彗屬參唐星也

憲宗元和十年三月有長星於太微尾至軒轅 十二

年正月戊子有彗星於畢

穆宗長慶元年正月己未有星孛於翼二月丁卯孛於太微西上將六月有彗星於昴長一丈凡十日不見

文宗太和二年七月甲辰有彗星於右攝提南長二尺八年九月辛亥有彗星於太微長丈餘西北行越郎

位庚申不見 開成二年三月丙午有彗星於危長七尺餘西指南斗戊申在危西南芒耀愈盛癸丑在虛辛酉長丈餘西行稍南指壬戌在婺女長二丈餘廣三尺

癸亥愈長且濶三月甲子在南斗乙丑長五丈其末兩
岐一指氏一掩房丙寅長六丈無岐北指在亢七度丁
卯西北行東指己巳長八丈餘在張癸未長三尺在軒
轅右不見凡彗星晨出則西指夕出則東指乃常也未
有遍指四方凌犯如此之甚者八月丁酉有彗星於虛
危虛危為元枵枵耗名也 三年十月乙巳有彗星於
軫魁長二丈餘漸長西指十一月乙卯有彗星於東方
在尾箕東西亘天十二月壬辰不見 四年正月癸酉

有彗星於羽林衛分也閏月丙午有彗星於卷舌西北
二月己卯不見 五年二月庚申有彗星於營室東壁
間二十日滅十一月戊寅有彗星於東方燕分也

武宗會昌元年七月有彗星於羽林營室東壁間也十
一月壬寅有彗星於北落師門在營室入紫宮十二月
辛卯不見并州分也

宣宗大中六年三月有彗星於觜參參唐星也 十一
年九月乙未有彗星於房長三尺

懿宗咸通五年五月己亥夜漏未盡一刻有彗星出東方色黃白長三尺在婁徐州分也 九年正月有彗星於婁胃 十年八月有彗星於大陵東北指占為外夷兵及水災

僖宗乾符四年五月有彗星 光啟元年有彗星於積水積薪之間 二年五月丙戌有星孛於尾箕歷北斗攝提占曰貴臣誅

昭宗大順二年四月庚辰有彗星於三台東行入太微

掃大角天市長十丈餘五月甲戌不見宦者陳匡知星
奏曰當有亂臣入宮三台太一三階也太微大角帝庭
也天市都市也 景福元年五月蚩尤旗見初出有白
彗形如髮長二尺許經數日乃從中天下如匹布至地
如蛇六月孫儒攻揚行密於宣州有黑雲如山漸下隊
於儒營上狀如破屋占曰營頭星也十一月有星孛於
斗牛占曰越有自立者十二月丙子天欖出於西南已
卯化為雲而沒 二年三月天久陰至四月乙酉夜雲

稍開有彗星於上台長十丈餘東行入太微掃大角入
天市經三旬有七日益長至二十餘丈因雲陰不見
乾寧元年正月有星孛於鶉首秦分也 天祐二年四
月甲辰有彗星見於北河貫文昌長三丈餘陵中台下
台五月乙丑夜自軒轅左角及天市西垣光芒猛怒其
長亘天丙寅雲陰至辛未少霽不見兩河為天闕在東
井間而北河中國所經也文昌天之六司天市都市也
梁太祖乾化二年四月壬申彗出張甲戌彗出靈臺

後唐明宗天成三年十月庚午彗出西南長丈餘東南指在牛宿五度至三夕不見

末帝清泰三年九月己丑彗出虛危長尺餘形微細經天壘哭星其年十一月帝遇難晉高祖登位

晉高祖天福六年九月壬子彗出西方掃天市垣長丈餘八年十月庚戌彗見東方西指尾跡長一尺在角九度

周世宗顯德三年正月壬戌夜有星孛於參宿其芒指

於東南

宋太祖皇帝開寶八年六月甲子彗出柳長四丈晨見東方西南指歷輿鬼至東壁凡十一舍八十三日而滅是歲平江南

太宗端拱二年六月戊子有彗出東井積水西青白色光芒漸長晨見東北旬日夕見西北歷右攝提凡三十日至亢沒

真宗咸平元年正月甲申有彗出營室北光芒尺餘至

丁酉凡十四日滅 六年十一月辛亥旄頭犯輿鬼占
與彗同甲寅有星孛於井鬼大如杯色青白光芒四尺
餘犯五諸侯歷五車入參凡三十餘日沒占有燕兵明
年冬契丹入寇 天禧二年六月辛亥彗出北斗魁第
二星東北長三尺許與北斗第一星齊北行經天牢拂
文昌長三丈餘歷紫微三台軒轅遠行而西至七星凡
三十七日沒

仁宗明道二年二月戊戌東北方有含譽星見其色黃

白有光芒長二尺許其後章獻明肅太后崩或以為彗
景祐二年八月壬戌夜有星孛於張翼長七尺濶五
寸十二日而沒十二月己未夜有星出外屏有芒氣

皇祐元年二月丁卯彗出虛晨見東方西南指歷紫微
至婁凡一百一十四日而沒占曰有兵喪 嘉祐元年

七月彗出紫微歷七星其色白長丈餘至八月癸亥滅
英宗治平三年三月己未彗出營室晨見東方長七尺
許西南指危洎墳墓漸東遠行近日而伏至辛巳夕見

西北有星無芒彗益東行別有白氣一濶三尺許貫紫
微極星并房宿首尾入濁益東行歷文昌北斗貫尾至
壬午星復有芒彗長丈餘濶三尺餘東北指歷五車白
氣為岐橫天貫北河五諸侯軒轅太微五帝座內五諸
侯及角亢氐房宿癸未彗長丈五尺有星孛氣如一升
器歷營室至張凡一十四舍積六十七日星氣孛皆滅
占曰白氣長星也孛氣孛也光如筵者彗也為兵喪水
旱饑疫之災

神宗熙寧八年十月乙未星出東南軫度中如填青白
丙申西北生光芒長三尺斜指軫若彗丁酉光芒長五
尺戊戌長七尺斜指左轄至丁未入濁不見主兵喪

元豐三年七月癸未彗出西北太微垣郎位南白氣長
一丈斜指東南在軫度中丙戌向西北方行在翼度中
戊子長三尺斜穿郎位癸卯犯軒轅至丁酉入濁不見
庚子晨復出於張度中至戊午凡三十有六日沒不見
主除舊布新兵喪火災又主京城有兵變

哲宗紹聖四年八月己酉彗出氐度中如填有光色白
氣長三尺斜指天市垣中星九月壬子光芒長五尺入
天市垣己未犯天市宦者主侍臣有憂庚申犯天市垣
帝座戊辰沒不見主兵喪大水及赦又主五穀大貴侍
臣有憂又主人民亂大臣憂

徽宗崇寧五年正月戊戌彗出西方如杯口大光芒散
出如碎星長六丈濶三尺斜指東北自奎宿貫婁胃昴
畢後入濁不見主兵喪大饑西北宜備之 大觀四年

五月丁未彗出奎婁光芒長六尺北行入紫微垣至西北入濁不見主水旱穀傷兵饑人主惡之

欽宗靖康元年六月壬戌彗出紫微垣主天下兵變破軍亡國閏十一月彗竟天時金人入寇京城失守

高宗紹興元年九月偽齊長星見於是劉豫謀明年遷十二月戊寅彗星見二年八月甲寅彗見胃占彗大則除舊布新兵饑疫癘水旱交興至九月甲戌乃沒次年金人陷金州入興元十五年四月戊寅彗出東方

宿度內五十餘日乃沒占為兵饑臣下失忠務私彗掃
除之丙申復出參度旬有五日乃伏是歲蒙國始建號
改元五月丁巳彗星因為客星其色青白占喪 十六

年十二月戊戌彗出西南危宿 十七年正月乙亥彗

出東北方女宿二月二日乃伏 二十二年七月丙午

彗見東北方井宿內丁未其星如木星光芒長二尺占

天所以去無道建有德彗出有叛者兵起大水晉邦尤
甚彗晨見東方又為君臣爭明癸丑夜彗星犯五諸侯

占大臣憂執法之臣凶

孝宗淳熙二年七月辛丑夜泛出一小星在紫微垣外
七公星之上小如火星參然蓬勃體氣蒼白是為孛星
占孛星惡氣所生為亂兵孛德又云參然孛焉兵之類
也無內亂則水兵天下合謀闇蔽不明有所傷害災甚
於彗

寧宗嘉定十五年八月甲午彗星出右攝提光芒約三
丈以上其體小如木星凡兩月行歷氐房心乃沒占彗

本類星末彗大則除舊布新天所以去無道而建有
德彗出有叛者兵起其國彗星昏見其國受兵於是其
應金主殂九月壬戌彗星消伏

文獻通考卷二百八十六

欽定四庫全書

文獻通考卷二百八十七

鄱陽馬端臨貴與著

象緯考十

月五星凌犯

秦始皇之時熒惑守心及天市芒角色赤如雞血始皇既死適庶相殺二世即位殘骨肉戮將相太白再經天因以張楚並興兵相蹈藉

蹈音臺登躡也或作蹈

秦遂以亡

漢高帝三年秋太白出西方有光幾中

幾中近踰身

乍北乍

南過期乃入辰星出四孟

法當出四仲出四孟為易主之象

是時項羽

為楚王而漢已定三秦與相距滎陽太白出西方有光

幾中是秦地戰將勝而漢國將興也辰星出四孟易王

之表也後二年漢滅楚

十二年春滎惑守心

心為天王也

四月宮車晏駕

孝文帝後七年七月火東行行畢陽環畢東北出而西

逆行至昴即南乃東行占曰為喪死寇亂畢昴趙也其

年帝崩

孝景三年填星在婁幾入還居奎奎魯也占曰其國得地為得填星是歲魯為國 四年七月癸未火入東井行陰又以九月己未入輿鬼戊寅出占曰為誅又為火災後二年有粟氏事其後未央東闕災 中元三年填星當在觜觴參去居東井占曰亡地不廼有女憂

孝武建元六年熒惑守輿鬼占曰為火變有喪是歲高園火災竇太后崩 元鼎五年太白入於天苑占曰將

以馬起兵一曰馬將以軍而死耗其後以天馬故誅大
宛馬大死於軍 元鼎中熒惑守南斗占曰熒惑所守
為亂賊喪兵守之久其國絕祀南斗越分也其後越相
呂嘉殺其王及太后漢兵誅之滅其國

孝昭始元中漢宦者梁成恢及燕王候星者吳莫如見
蓬星出西方天市東門行過河鼓入營室中恢曰蓬星
出六十日不出三年下有亂臣戮死於市後太白出西
方下行一舍復上行二舍而下去太白血兵上復下將

有戮死者後太白出東方入咸池東下入東井人臣不
忠有謀上者後太白入太微西藩第一星北出東藩第
一星北東下去太微者天廷也太白行其中宮門當閉
大將被甲兵邪臣伏誅熒惑在婁逆行至奎法曰當有
兵後太白入昴莫如曰蓬星出西方當有大臣戮死者
太白星入東井太微廷出東門漢有死將後熒惑出東
方守太白兵當起主人不勝後流星下燕萬載宮極東

去

李竒曰極屋梁也三輔間名為極或曰棟極也三輔
間名棟為極尋棟東去也延篤謂之堂前闌楯也

法曰國恐有誅其後左將軍桀驃騎將軍安與長公主
燕刺王謀作亂咸伏其辜兵誅烏桓

孝宣本始元年四月壬戌甲夜辰星與參出西其二年

七月辛亥夕辰星與翼出皆為蚤占曰大臣誅其後熒

惑守房之鈞鈐鈞鈐天子之御也晉灼曰上言房為天
駟其陰右驂旁有二

星曰鈐故曰天子之御也占曰不太僕則奉車不黜即死也房心天

子之宮也房為將相心為子屬也其地宋今楚彭城也

四年七月甲辰星在翼月犯之占曰兵起上卿死

將相也是日熒惑入輿鬼天質占曰大臣有誅者名曰

天賊在大人之側 地節元年正月戊午乙亥月食熒

惑

孟康曰凡星入月見月中為星食月月掩星星減為月食星

熒惑在角亢占曰憂

在宮中非賊而盜也有內亂讒臣在旁其辛酉熒惑入
氐中氐天子之宮熒惑入之有賊臣後四年霍氏謀反
坐誅

孝成建始元年七月熒惑踰歲星居其東北半寸所如
連李時歲星在關星西四尺所熒惑初從畢口大星東

東北往數日至往疾去遲占曰熒惑與歲鬪有病君饑

歲至河平元年三月旱傷麥民食榆皮二年十二月壬

申太皇太后避時昆明東觀

如淳曰食貨志武帝修昆明池列觀環之或曰即病

謝君男故避其時

十一月乙卯月食填星星不見時在輿鬼西

北八九尺所占曰月食填星流民千里至河平元年三

月流民入函谷關 河平二年十月下旬填星在東井

軒轅南端大星尺餘歲星在其西北尺所熒惑在其西

北二尺所皆從西方來填星貫輿鬼先到歲星次熒惑

亦貫輿鬼十一月上旬歲星熒惑西去填星皆西北逆行占曰三星若合是謂驚位是謂絕行外內有兵與喪改立王公其十一月丁巳夜郎王歆大逆不道牂牁太守立捕殺歆三年九月東郡盜起左將軍千秋卒史丹為左將軍明年梁王賀薨陽朔元年七月壬子月犯心星占曰其國有憂若有大喪房心為宋今楚地十一月楚王友薨綏和二年春熒惑守心二月乙丑丞相翟方進欲塞災異自殺三月丙戌宮車晏駕

哀帝元壽元年十一月歲星入太微逆行干右執法占
曰大臣有憂執法者誅若有罪二年十月戊寅高安侯
董賢免大司馬歸第自殺

李尋上疏曰臣聞五星者五行之精五帝司命應王
者號令為之節度歲星主歲事為統首號令所紀今
失度而盛此君指意欲有所為未得其節也又填星
不避歲星者后帝共政相留於奎婁

張晏曰歲星為
帝填星為女主

也當以義斷之熒惑往來亡常周歷兩宮作態低昂

張晏曰兩宮入天門上明堂貫尾亂宮孟康曰角兩星為天門房

謂紫微太微為明堂尾為後宮蘇林曰常占當從尾北而今貫之尾為後宮之義也

太白發越犯庫

張晏曰發越疾貌庫天庫也孟康曰奎為天庫兵寇之應也貫黃龍入帝庭

張晏曰黃龍軒轅也當門而出隨熒惑入天門至房而分欲與

熒惑為患不敢當明堂之精此陛下神靈故禍亂不

成也熒惑厥弛張晏曰厥弛動搖貌佞巧依勢微言毀譽進類

蔽善師古曰進其黨類而壅蔽善人太白出端門孟康曰端門太微正南門臣有

不臣者火入室金上堂張晏曰熒惑入營室也孟康曰火入室謂熒惑歷兩宮也

金謂太白也上
堂入房星也

不以時解其憂凶填歲相守又主內

亂宜察蕭牆之內毋忽親疏之微

師古曰微謂其事微

誅放佞

人防絕萌芽以盪滌濁滅消散積惡

師古曰滅與穢同也

毋使

得成禍亂辰星主正四時當效於四仲四時失序則

辰星作異今出於歲首之孟天所以謹告陛下也政

急則出早政緩則出晚政絕不行則伏不見而為彗

第

師古曰第與宇同

四孟皆出為易王命四季皆出為星家

所諱今幸獨出寅孟之月蓋皇天所以篤祐陛下師

曰篤厚也祐與右同右猶助也宜深自改治國故不可以戚戚欲速

則不達經曰三載考績三考黜陟

師古曰虞書舜典之辭也言三年一

考功績三考一行黜陟也加以號令不順四時既往不咎來事之

師也

莽地皇四年秋太白在太微中燭地如月太白為兵太微為天庭太白贏而北入太微是大兵將入天子廷也時莽遣兵至昆陽為光武所破漢將鄧暠進攻京師十月殺莽大兵蹈籍宮廷之中更始入長安敗

赤眉立劉盆子為天子皆以大兵入宮廷是其應也
光武建武六年九月丙戌月犯太微西藩十一月辛亥
月犯軒轅 七年九月庚子土入鬼中漢史鎮星逆行
輿鬼女主貴親有憂巫咸曰有土功事是歲太白經太
微 八年四月辛未月犯房第二星光芒不見 九年
正月乙卯金犯婁南星甲子月犯軒轅第二星壬寅犯
心大星七月戊辰月並犯昴黃帝星占土犯鬼皇后有
憂失亡其勢河圖月犯房天子有憂四足之蟲多死漢

史曰國有憂將軍死 九年七月乙卯金犯軒轅大星

十一月金又犯軒轅

孟康曰犯七寸以內光芒相及也韋昭曰自下往觸之曰犯 軒

轅者後宮之官大星為皇后金犯之為失勢時郭后已

失勢見疎後廢為中山太后 十二年七月丁丑月犯

昴頭兩星八月辛酉水見東方翼分九月甲午火犯輿

鬼 十三年二月乙卯火犯輿鬼西北黃帝占曰熒惑

守輿鬼大人憂一曰多火災石氏曰為旱 十六年四

月土星逆行 十七年三月乙未火逆行從東門入太

微到執法星東已酉南出端門 十八年十二月壬戌
月犯木星 十九年閏月戊申火逆從氐到亢 二十
一年七月辛酉月入畢 二十三年三月癸未月食火
星郝萌占熒惑逆行氐為失火 三十一年七月戊午
火在輿鬼一度入鬼中出尸星南半度十月己亥犯軒
轅大星熒惑為凶哀其後二年光武崩 中元二年八
月丁巳火犯太微西南角星相去二寸西南角星為將
相後太尉趙熹司徒李訢坐事免官

孝明永平元年閏九月辛未火在太微左執法星所光
芒相及十一月辛未土逆行乘東井北軒轅第二星

二年十二月戊辰月食火星 十年七月甲寅月犯歲

星 十一年六月壬辰火犯土星 十三年閏月丁亥

火犯輿鬼為大喪質星為大臣誅戮

晉灼曰鬼五星其中白者為質其

年十二月楚王英坐謀逆自殺 十五年十一月乙丑

太白八月中為大將戮人主亡不出三年後三年孝明

帝崩 十六年正月丁丑歲星犯房右驂北第一星不

見辛巳乃見

石氏星經曰歲星守房良馬出
厩古今注曰正月丁未月犯房

房右驂為

貴臣歲星犯之為見誅是後司徒邢穆坐與阜陵王延交
通知逆謀自殺四月癸未太白犯畢畢為邊兵後北匈
奴寇入雲中至咸陽使者高宏發三郡兵追討無所得
太僕祭彤坐不進下獄

孝章建初元年正月丁巳太白在昴西一尺二月甲申
金入斗魁

孝和永元二年九月金犯軒轅占曰女主失勢其年實

氏被誅太后失勢 五年正月甲戌月乘歲星七月壬

午歲星犯軒轅大星九月金在南斗魁中

為水石氏
曰為旱 為

大將將死火犯房北第一星為將相其六年正月司徒

丁鴻薨十二月車騎將軍鴻坐追虜失利下獄死 六

年六月丁亥金在東井 十三年正月辛未水乘輿鬼

十二月癸巳犯軒轅大星 十四年正月乙卯月犯軒

轅在太微中二月丁酉水入太微西門 十六年七月

庚午水在輿鬼中輿鬼為死喪後一年帝崩

孝安永初元年五月戊寅熒惑逆行守心前星心為天子明堂熒惑逆行守之為反臣時安帝未臨朝鄧太后攝政鄧騭及弟悝等秉國司空周章意不平謀閉宮門誅騭等廢太后及帝事覺自殺三年正月庚戌月犯

心後星

河圖曰亂臣在旁

巳亥太白入斗中月犯心後星不利

子心為宋五月丁酉沛王牙薨太白入斗中為貴相凶

臣昭按楊厚對曰以為諸侯王子多在京師容有非常宜亟發還本國太后從之星尋滅不見以斯而言太白入之災在貴相六月癸酉太白入輿鬼為將凶後中郎將任尚

坐賊棄市 元初元年三月癸酉熒惑入輿鬼 二年

九月辛酉熒惑入輿鬼中 三年三月熒惑入輿鬼中

五月丙寅太白入畢口 黃帝占大敗近期十五日遠期四十日又曰大臣當之國易主

七月甲寅歲星入輿鬼閏月己未太白犯太微左執法

四年正月丙戌歲留輿鬼 石氏經曰歲星入留輿鬼五十日不下民有大喪百

日不下民半死黃帝經曰守鬼十日金錢散諸侯邾萌曰五穀多傷民以飢死者無數 四月壬戌

太白入輿鬼中 石氏占太白入鬼一曰病在女主一曰將戮死 己巳辰星入輿

鬼中 邾萌曰以罪誅大臣一曰后疾一曰大人憂 五月己卯辰星犯歲星六

月丙申熒惑入輿鬼中戊戌犯輿鬼大星九月辛巳太

白入南斗口中

黃帝經曰大人當之國易政

五年三月丙申鎮星

犯東井鉞星五月庚午辰星犯輿鬼質星丙戌太白犯

鉞星

六年四月癸丑太白入輿鬼

郝萌曰太白守輿鬼疾在女主

六

月丙戌熒惑在輿鬼中

黃帝經曰熒惑犯守鬼國有大喪有女喪大將有死者荊州星

占曰熒惑犯鬼忠臣戰死不出一年中

丁卯鎮星在輿鬼中

黃帝經曰鎮星入鬼中大

臣誅海中石氏曰大人憂

辛未太白犯左執法自永初五年到永寧

七年中太白一晝見經天再入輿鬼一守畢再犯左執

法入南斗犯鉞星熒惑五入輿鬼鎮星一犯東井鉞星
一入輿鬼歲星辰星再入輿鬼凡五星入輿鬼中皆為
死喪熒惑太白甚犯鉞質星為誅戮斗為貴將執法為
近臣客星在虛危為喪為哭泣

星占曰不一
年遠期二年

昴畢為邊

兵又為獄事至建光元年三月癸巳鄧太后崩五月庚
申太后兄車騎將軍隲等七侯皆免官自殺是其應也

延光

古今注曰元年四
月丙午太白晝見

二年八月己亥熒惑出太微

端門

三年二月辛未太白犯昴

石氏星占曰太白守
昴兵從門闕入主人

走邠萌曰不有亡國必有誅主又云入昴大赦

五月癸丑太白入畢

邠萌曰太白入畢口

馬馳人走又曰有中喪

九月壬寅鎮星犯左執法

四年四月太

白入輿鬼中

古今注曰四月甲辰入

六月壬辰太白出太微九月

甲子太白入斗口中十一月客星見天市熒惑出太微

為亂臣太白犯昴畢為近兵一曰大人當之鎮星犯左

執法有誅臣太白入輿鬼中為大喪太白出太微為中

宮有兵入斗口為貴將相有誅時大將軍耿寶中常侍

江京與阿母王聖等構譖太子保廢之以北鄉侯懿代

四年三月帝崩立北鄉侯侯病薨京等復不欲立保白
太后更徵諸王子擇所立中黃門孫程等共誅江京閹顯
立保為天子是為順帝皆姦人強臣狂亂王室其於死
亡誅戮兵起宮中是其應也

孝順永建二年二月丁巳月犯心七月丁酉犯昴八月
乙巳熒惑入輿鬼 三年二月癸未月犯心後星 五
年夏熒惑守氐諸侯有斬者是冬班始腰斬馬市 六
年四月熒惑入太微中犯左右執法西北方六寸所

永和二年八月庚子熒惑犯南斗斗為吳

黃帝經曰不期年國有亂

有憂海中占為多火災一曰旱古今注曰九月壬午月入畢口中

明年五月吳郡太守

行丞事羊珍等反又江賊蔡伯流等攻廣陵燒城郭殺

都尉 三年八月甲寅辰星入輿鬼己酉熒惑入太微

辰入輿鬼為大臣有死者入太微亂臣在廷中其四年

祀南郊中常侍張遼等與曹騰等爭權白帝言騰等反

矯詔收之騰等自解說帝悟遼自知事不諧乃奔走自

刺又征西將軍馬賢擊西羌父子俱戰沒是其應也

四年七月熒惑入南斗犯第三星八月入太微中斗為
貴相為揚州熒惑犯之為兵喪其六年大將軍梁商薨
九江丹陽賊周生等反攻沒郡縣 漢安二年五月丁
亥辰星犯輿鬼占為大喪六月乙丑熒惑光芒犯鎮星
占為大人忌明年八月孝順帝崩又明年冲帝崩
孝質本初元年三月癸丑熒惑入輿鬼四月辛巳太白
入輿鬼皆為大喪五月庚戌太白犯熒惑為逆謀閏月
一日帝為梁冀所鴆崩

孝桓建和元年八月壬寅熒惑犯輿鬼質星 二年二月辛卯熒惑行在輿鬼中 三年五月己丑太白行入太微右掖門留十五日出端門丙申熒惑入東井八月己亥鎮星犯輿鬼中南星乙丑彗星芒長五尺見天市中東南指色黃白九月戊辰不見熒惑犯輿鬼為死喪質星為戮臣入太微為亂臣鎮星犯輿鬼為喪彗星見天市中為質貴人至和平元年十二月甲寅梁太后崩梁冀益驕亂矣 永壽元年三月丙申鎮星逆行入太

微中七十四日去左掖門七月己未辰星入太微中八
十日去左掖門八月己巳熒惑入太微二十一日出端
門太微天子廷也鎮星為貴臣妃后逆行為匿謀辰星
入太微為大水一曰後宮有憂是歲雒水溢至津門南
陽大水熒惑留入太微中又為亂臣是時梁氏專政九
月癸巳熒惑犯歲星為姦臣謀大將戮 二年六月甲
寅辰星入太微遂伏不見辰星為水為兵為妃后八月
戊午太白犯軒轅大星為皇后其三年四月戊寅熒惑

入東井口中為大臣有誅者其七月丁丑太白犯心前
星為大臣後一年四月懿獻皇后以憂死大將梁冀使
其蒼頭秦宮刺殺議郎邴尊又欲殺鄧后母宣事覺桓
帝收冀及妻壽襄城君印綬皆自殺誅諸梁及孫氏宗
族或徙邊是其應也 延熹四年三月甲寅熒惑犯輿
鬼質星其占大臣有戮死者五年南郡太守李肅坐罪
棄市 七年七月戊辰星犯歲星八月庚戌熒惑犯
輿鬼質星庚申歲星犯軒轅大星十月丙辰太白犯房

北星丁卯辰星犯太白十二月乙丑熒惑犯軒轅第二
星辰星犯歲星為兵熒惑犯質星有戮臣歲星犯軒轅
為女主憂太白犯房北星為后宮其八年二月太僕南
鄉侯左勝以罪賜死勝弟中常侍上蔡侯惲北鄉侯黨
皆自殺癸亥皇后鄧氏坐執左道廢遷於祠宮死親黨
皆係暴室又荊州刺史芝等坐為賊所拘畧桂陽太守
任允背敵走皆棄市是其應也 八年五月癸酉太白
犯輿鬼質星壬午熒惑入太微右執法閏月己未太白

犯心前星十月癸酉歲星犯左執法十一月戊午歲星
入太微犯左執法 九年正月壬辰歲星入太微中五
十八日出端門六月壬戌太白行入輿鬼七月乙未熒
惑行輿鬼中犯質星九月辛亥熒惑入太微西門積五
十八日 永康元年正月庚寅熒惑逆行入太微東門
留太微中百一日出端門七月丙戌太白晝見經天太
白犯心前星太白犯輿鬼質星有戮臣熒惑入太微為
賊臣太白犯心前星為兵喪歲星入太微犯左執法將

相有誅者歲星入守太微五十日占貴人憂太白熒惑
入輿鬼皆為死喪又犯質星為戮臣熒惑留太微中百
一日占為人主太白晝見經天為兵憂在大人其九年
十一月太原太守劉瓚南陽太守成瑨皆坐殺無辜荆
州刺史李隗為賊所拘尚書郎孟璫坐受金漏言皆棄
市永康元年十二月丁丑桓帝崩太傅陳蕃大將軍竇
武尚書令尹勳黃門令山冰等皆枉死太白犯心熒惑
留太微之應也

孝靈建寧元年六月太白在西方入太微犯西蕃南頭星太微天廷也太白行其中宮門當閉大將被甲兵大臣伏誅其八月陳蕃竇武等被害 熹平元年十月熒惑入南斗中占曰熒惑所守為兵亂斗為吳其十一月會稽許昭等聚眾自稱大將軍攻破郡縣 五年四月熒惑在太微中守屏占為亂臣是時中常侍趙忠張讓等並為姦亂 光和四年四月熒惑逆行守心後星十月戊午月食心後星占曰為大喪後三年帝崩 中平

六年八月丙寅太白犯心前星戊辰犯心中大星其日未冥四刻大將軍何進於省中為諸黃門所殺己巳車騎將軍何苗為進部曲將吳匡所殺

魏文帝黃初四年三月癸卯月犯心大星占曰心為天王位王者惡之十二月丙子月犯心大星占同上五年歲星入太微逆行積百四十九日乃出占曰五星入太微從右入三十日已上人主有大憂一曰有赦七年五月帝崩明帝即位赦天下六年五月壬戌熒惑

入太微至壬申與歲星相及俱犯右執法至癸酉乃出
占曰從右入三十日已上人主有大憂又日月五星犯
左右執法大臣有憂一曰執法者誅金火尤甚十一月
皇子東武陽王鑿薨七年正月驃騎將軍曹洪免為庶
人四月征南大將軍夏侯尚薨五月帝崩蜀記稱明帝
問黃權曰天下鼎立何地為正對曰當驗天文往者熒
惑守心而文帝崩吳蜀無事此其徵也按三國史並無
熒惑守心之文疑是入太微八月吳遂圍江夏寇襄陽

大將軍宣帝救襄陽斬吳將張霸等兵喪更王之應也
明帝太和五年五月熒惑犯房占曰房四星股肱臣將
相位也月五星犯之將相有憂其七月車騎將軍張郃
追諸葛亮為亮所殺十二月太尉華歆薨十一月乙酉
月犯軒轅大星占曰女主憂十二月甲辰月犯鎮星凡
月蝕五星其國皆亡五星八月其野有逐相 六年三
月乙亥月犯軒轅大星 青龍二年十月乙丑月犯鎮
星戊寅月犯太白占曰人君死又為兵景初元年公孫

淵叛討之三年正月帝崩 三年三月辛卯月犯輿鬼
輿鬼主斬殺占曰人多病國有憂又曰大臣憂是年夏
及冬大疫四年五月司徒董昭薨七月己巳月犯鍵閉
占曰有火災三年七月崇華殿災 三年六月丁未填
星犯井鉞戊戌太白又犯之占曰凡月五星犯井鉞悉
為兵災一曰斧鉞用大臣誅七月填星犯東井距星占
曰大人憂大水五穀不成景初元年夏大水傷稼十月
月犯熒惑占曰貴人死二年四月司徒韓暨薨 四年

五月太白犯畢左股第一星占曰畢為邊兵又主刑罰
九月涼州塞外胡阿畢師使侵犯諸國西域校尉張就
討之斬首捕虜萬計七月甲寅太白犯軒轅大星占曰
女主憂其後皇后毛氏崩 景初二年二月己丑月犯
心距星又犯中央大星五月乙亥月又犯心距星及中
央大星按占曰王者惡之犯前星太子有憂三年正月
帝崩太子立卒見廢其年十月甲午月犯箕占曰將軍
死正始元年車騎將軍黃權薨

少帝正始元年四月戊午月犯昴東頭第一星十月庚寅月又犯昴北第四星占曰月犯昴胡不安二年六月鮮卑阿妙兒等寇西方敦煌太守王延破之斬二萬餘級三年又斬鮮卑大帥及千餘級二年九月癸酉月犯輿鬼西北二星三年二月丁未又犯西南星占曰有錢令一曰大臣憂三年三月太尉滿寵薨四年正月帝加元服賜羣臣錢各有差四年十一月月再犯井鉞是月宣帝討諸葛恪恪棄城走五年三月曹爽征蜀

五年十一月癸巳填星犯亢距星占曰諸侯有失國者
七年七月丁丑月犯左角占曰天下有兵左將軍死
七月乙亥熒惑犯畢距星占曰有邊兵一曰刑罰用
九年正月辛亥月犯亢南星占曰兵起一曰將軍死七
月癸丑填星犯樞閉占曰王者不宜出宮下殿嘉平元
年天子謁陵宣帝奏誅曹爽等天子野宿於是失勢
嘉平元年正月甲子太白襲月六月太白犯井距星占
曰國失政大臣為亂四月太白犯輿鬼占曰大臣誅一

曰兵起其年宣帝奏廢誅曹爽 二年三月己未太白
又犯井距星三年七月王凌與楚王彪有謀皆伏誅人
主遂卑

吳孫權赤烏十三年夏五月月北至熒惑逆行入南斗
秋七月犯魁第三星而東漢晉春秋云逆行按占熒惑
入南斗三月吳王死一曰熒惑逆行其地有死君太和
二年權薨是其應也故國志書於吳是時王凌謀立楚王
彪謂斗中有星當有暴貴者以問知星人浩詳詳疑有

故欲悅其意不言吳有死喪而言淮南楚分吳楚同占
當有王者興故凌計遂定 三年四月戊寅月犯東井
五月甲寅月犯亢距星占曰軍將死一曰為兵是月王
凌楚王彪等誅七月皇后甄氏崩 四年三月吳將為
寇鎮東將軍諸葛誕破走之其年七月己巳月犯輿鬼
九月乙巳又犯之十月癸未熒惑犯亢南星占羣臣有
亂十一月丁未月犯鬼積尸 五年六月戊午太白犯
角占曰羣臣有謀不成庚辰月犯箕星占曰軍將死七

月月犯星井鉞丙午月又犯鬼西北星占曰國有憂十
一月癸酉月犯東井距星占曰將軍死正元元年正月
鎮東將軍母邱儉揚州刺史文欽反兵俱敗死二月李
豐及弟翼后父張緝等謀亂事泄悉誅皇后張氏廢九
月帝廢為齊王蜀將姜維攻隴西車騎將軍郭淮討破
之


高貴鄉公正元二年二月戊午熒惑犯東井北轅西頭
第一星 甘露元年七月乙卯熒惑犯東井鉞星壬戌

月又犯鉞星八月辛亥月犯箕吳廢孫亮 太平元年
九月壬辰太白犯南斗吳志所書也占曰太白犯斗國
有兵大臣有反者其明年諸葛誕反又明年孫綝廢亮
吳魏並有兵事也 甘露元年九月丁巳月犯東井二
年六月己酉月犯心中央大星八月壬子歲星犯井鉞
九月庚寅歲星逆行乘井鉞十月丙寅太白犯亢距星
占曰逆臣為亂人君憂景元元年五月有成濟之變諸
葛誕誅皆其應也 二年三月庚子太白犯東井占曰

國失政大臣為亂是夜歲星又犯東井占曰兵起至景
元元年高貴鄉公敗 三年八月壬辰歲星犯輿鬼質
星占曰斧鑕用大臣誅 四年四月甲申歲星又犯輿
鬼東南星占曰鬼東南星主兵木入鬼大臣誅景元元
年殺尚書王經

元帝景元元年春月犯建星按占月五星犯建星大臣
相譖其後鍾會鄧艾破蜀會譖艾 二年四月熒惑入
太微犯右執法占曰人主有大憂一云大臣憂 四年

十月歲星守房占曰將相有憂一云有大赦明年鄧艾
鍾會皆夷滅赦蜀士五年帝遜位



文獻通考卷二百八十七